

香畹樓憶語

標點精校普及本



上海中央書店
印行

新式標點
香畹樓憶語
陳裴之朗玉著

全 一 冊

1935

上海中央書店印行

民國二十四年十月出版

香畹樓憶語 全書一冊 定價三角



著	者	陳	裴	之
校	訂	者	儲	菊
出	版	者	上	海
印	刷	者	中	央
發	行	者	上	海
			中	央
			書	店
			書	店
			店	

總發行所上海中央書店

分發行所上海及各省各大書局

香畹樓憶語序言

余家同懷十人，惟紫妹最幼最美最才最賢，而難得者為最孝。其居我生母之喪也，哀毀骨立，徒以老父在堂，未即身殉；嫡母既撫如所生，妹亦曲盡恭順，惟於背燈倚枕，感念亡親，淚漬衾裯，歷數年如一日也。余聞其將有所適，歸叩其詳。妹曰：雲公子人品學問，有目共賞，母俟鄙言，聞其傳家孝友，天性過人，此尤妹所怵怵心動者耳！余曰：門高族大，契洽良難，以吾妹淑性處之，自無不宜家宜室；惟是同母手足，目前僅我兩人，一旦睽離，深縈我念。今與妹約：別後如不暇搦管，覓一花一草寄我，即可知妹近狀矣。妹領之。畫楫渡江，積旬倅返，發函伸紙，蛺蝶雙飛，弄翠眠香，栩栩欲活，靈心飛動，喜可知已。今夏歸省養病，歡然握手，備述堂上之慈，夫人之賢，並聞雅孃龍媼云：此來舉室送行，潸然出涕，饋問之使，不絕於道，余方欣感交集，以為吾妹之賢孝，既有以上契親心。雖金鎗馬麥，定業難逃，然人定勝天，造化或容默挽耳。不虞曇華現影，落葉歸根，遽折連枝，使人痛絕。夫就妹生平論之：蕙心紈質，燕寢承歡，月滿花芳，玉郎專

寵，家山重到，骨月全逢，既親二老之顏，復告生身之墓。薤露素車之弔，備極哀榮；梨雲總帳之悲，靡間存歿。無毫髮之遺憾，無父母之貽罹。蘭緣既盡，撒手以去也固宜。惟聞父母告余云：公子以老親在上，力抑哀情，然決旬以來，惟見以眼淚洗面，逝者如斯，生者如之何？垂垂鶴髮，感激涕零，嗚呼吾妹，縱脫愛緣，鑒此芳情，亦當以玉簫再世矣。余多愁善病，蕉萃中年，既痛逝者，行自念也。一燈如豆，三復斯編，感公子之情多，惜佳人之命薄，幽窗冷雨，撲筆泫然。甲申巧月，太原瑞蘭雪涕拜題。

廣平居士以梅垞生新譜影梅庵傳奇，乞雲公子題詞，俾紆折玉之感，公子讀之益增悽悵。時距紫妹之仙去者十日矣。聞湘請於公子曰：影梅庵憶語，世艷稱之，然以公子之才品，遠過參軍，紫妹之賢孝，亦踰小宛，且此段因緣，作合之奇，名分之正，堂上之慈，夫人之惠，皆千古所罕有。前日讀君家大人慈訓，有曰：惜身心而報以筆墨，俾與朝雲菡桃並傳，公子其有意乎？公子乃坐碧梧庭院，滴淚濡毫，文不加點，隨時授余讀之，情文相生，悽艷萬狀，猶記紫妹未字

時，余嘗與鮑雪翹、雲韻秋贈香小燕諸人私語曰：「蘭儂吹氣如蘭，奉身如玉，除是侍香金童，甫能消受耳。既見公子，爭慶得人，飲餞之夕，芳菲滿堂，皆曰：『十妹此行，何異登仙，掛釵拂袖，多有感羨泣下者。』迨妹今夏歸省，語及公子恩誼，輒頻蹙曰：『薄命人惟恐消受不起。嗚呼！銘心刻骨之言，孰料為撒手離塵之讖哉！』妹之病也，姊姊嬈嬈，曾被關恤者，皆願以百身贖之；於其逝也，相向而哭，皆失聲。況以公子憐香惜玉，情之所鍾，其纏綿激楚，自有大難為懷者。然自有此作，紫妹既在所必傳，村拙如閨湘輩，亦得廁名簡末，此如淮南拔宅，雞犬皆仙，公子之心盡矣。紫妹之靈慰矣！題曰香呢樓憶語，仍影梅庵例也。世有牙曠，譜入宮商，烏紗細髻，登場學步之時，吾不知此後賺人清淚，又將幾許爾。」甲申七月，扶風閨湘居士揮淚謹書。

紫湘誄

紫湘秣陵王氏女，年十九，歸余子裴之為側室，婉嫺淑慎，門無間言，道光甲申七月四日，以疾卒。其生平言行，既見於余室人所為小傳矣。余憫其有柔嘉之德而早逝也，為此誄。

以哀之。頤道居士記。

嗚呼紫湘！秉德淳貞，淮水之秀，鍾山之英；嘒彼小星，以事君子，大婦心怡，高堂色喜，吾家族大，食指逾千，同聲稱熾，惟爾之賢，重親致歡，善承色笑，侍膳問安，惟爾之孝，佐餼調藥，以小君夙興夜寐，惟爾之勤；言罔愆禮，行知飾性，無違夫子，惟爾之敬；姬侍備此，令德克宣，允宜獲福，奚不永年！翦紙招魂，采蘅設祭，我作此辭，潛焉出涕！

紫姬哀詞

錢塘汪端允莊

紫姬碧玉，韶顏綠珠，慧性家近青楊之巷，門臨白鷺之洲，姊妹十人，姬其季也；畫徧十眉，舊名花蕊，館來雙髻，小字桃根，其歸我朗玉夫子也；春江打槳，官閣飄鈴，璧月凝輝，前身定呼明月，瓊花照影，幾生修到梅花；姬復性厭鉛華，夙耽詞翰，蘭羞佐餼，燕寢怡顏，椒頌流馨，驚臺浴德，潁川之門，無歧譽焉。客冬余卧病殊劇，姬佇苦哺糜，含辛調藥，中宵結帶，竟月罷妝，余疾既瘳，姬顏始解，嗚呼賢矣！豈知瑤華萎雨，瓊屑銷塵，扶病歸省，卒於母氏，蒼幃雪涕，蘭閣招魂，

羌渺渺兮予懷，佇珊珊之入夢，瑤情玉色，誰撰館陶仙子之銘，霞袂雲軒，待續寶鑑夫人之傳，詩成八律，淚綆千絲！

淚灑西風黯碧紗，鈿蟬零落弔明霞，雲中紫鳳長離鳥，池上天桃薄命花，夜月空林呼妙子，曉鐘殘夢見瑤華，疎星三五光初掩，愁看銀河絡角斜。（華譚妾石瑤華歿後，見形如平生，出抱朴子。）

蕊結同心九畹芬，渡江桃葉美人雲，畫眉菱鏡花雙笑，記曲珠簾月二分，篆玉鴛鴦猶勝字，泥金蛺蝶尚留裙，早梅官閣經行處，蓮屐蒼苔印碧紋。

月照香嬰畫閣虛，謝娘新詠麗芙蕖，聚花簾箔調鸚鵡，芸葉窗紗辟蠹魚，紅衲道人工寫韻，白雲仙子最知書，蘭膏翠羽留遺跡，奩豔重緡恨有餘。（婦人集陸姬孟珠號紅衲道人。何白雲，史忠妾。奩豔，董小宛輯。）

寒閨侍疾夜遲眠，藥裏勞君細意煎，彩勝倦簪挑菜節，羅屏靜掩試燈天，解歌芳草朝雲惹，潔奉蘭羞絡秀賢，猶記江城砧杵動，春纖疊雪擘吳綿。（太夫人及余夫婦禦寒襦褐，頻年

皆姬手製。

瓊肌病怯杏羅輕，眉翠翠多畫未成。虛幌藥煙愁擁髻，小窗花影罷吹笙。金猊火冷香燭
炷，玉馬風馳夢易驚。惆悵紅冰凝別淚，滿天梅雨闌闌城。

卓英橋邊問故家，晚烏啼斷六朝花。女牆靜夜潮初上，水榭新涼月正華。街到玉魚愁並
惹，撥殘金鳳怨琵琶。退紅衫子空裁製，白蝶飛灰散曉霞。

新月蛾眉憶晚妝，淒風纏帳泣歸航。哀蟬落葉秋如水，早雁明河夜漸涼。錦瑟驚絃懷夢
草，玉簫舊約近生香。畫簾微雨黃昏後，誰念檀奴髻欲霜。

女墳湖冷殯宮遙，舊日妝樓鎖寂寥。露砌碧苔吟蟋蟀，風廊翠竹網蟪蛄。秋雲羅帕溫香
漬，明月瓊杯豔影消。留得玉梅遺掛在，亭亭素質帶愁描。「秋雲羅帕」見麗情集，「明月
杯」見神仙傳。

同作

管筠靜初

秦淮烟柳石城潮，問訊青溪第幾橋？仙子鬢眉春黛染，美人衫袖落花嬌。方期洛水霞長映，何事崑山雪易消？惆悵罡風吹太急，一株玉樹隕南朝。

金燈照夜月初圓，往事分明在眼前；香雪梅花繞妝間，烟波桃葉渡江船；相看大婦憐中婦，豈料今年異去年。蘭語纏綿桃骨瘦，憶來一度一潸然！

江上青山隔翠微，白門楊柳夢依稀；空憐聽雨瀟瀟去，不見看花緩緩歸；四載玉顏成永訣，全家珠淚惜分飛。夜闌廬外天如墨，愁絕篝燈製殯衣。

黯澹文窗韻字紗，歸帆盼斷曲江涯；虎山尋夢烟初暝，鶴市招魂月正華；暫寄玉棺吳苑寺，待營香塚宋宮斜；舊桃坏土芳鄰在，天竺峯前弔落花。

又

陳華姬萼仙

我弟才華小鳳凰，（余舊題弟婦允莊明湖飲餞圖句。）得君亦復似鴛鴦。香名謝氏烏衣巷，春色盧家白玉堂；一樹瓊花留艷影，滿庭璧月照明妝；如何絕代嬋娟子，零落嫣紅隕曉

霜？

消息傳來掩淚聽，落花如雨葬傾城，青山曾見營新塚，翠水應知理舊盟；瑤瑟前塵悲曉夢，玉簫後約望來生，一鵲憶語從頭讀，香奩樓頭碧橫。

又

陳麗姬茗仙

楊柳南朝樹，芙蓉北苑妝，衣裳雕玉佩，樓閣鬱金堂。桃葉春波穩，瓊花夜月涼，當年嫁張碩，親見杜蘭香。

隋苑通吳苑，頻年數往還，含香吳寸趾，識曲謝雙鬟。纖柳銷春黛，天桃瘦玉顏，可憐扶病去，淒絕汝南灣。

滴淚空如水，傷心欲問天，魂歸殘月影，夢短落花煙，鸚鵡三生石，鴛鴦兩度船，玉簫情不斷，應結再生緣。

題詞

寄題朗玉弟湘煙小錄後

金壇女史吳規臣香輪

金雁棲塵醉翠缸，玉蟲炮蕊黯銀釭。柳絲烟鎖愁凝水，桃葉春寒夢渡江。花落餘香猶戀樹，月沉殘影尚留窗。碧鈿瑟瑟無消息，惆悵青琴擁鳳雙。

瓊樹經霜墮一枝，青谿殘籟雨絲絲。簪花小影琴雙髻，攬鏡新妝憶十眉。萼綠華來無定所，杜蘭香去未移時。玉谿識語分明在，記取湘煙本事詩。（事見香畹樓憶語）

題小雲夢玉詞後

吳江郭 慶頻迦

清潤潘郎玉琢同，新詞如水氣如虹。如何才載松陵道，便對青春葬小紅？
小劫忽忽八十過，自知綺語風生多。老來黃九風情減，未要當場鐵秀訶。（余自被焚詞集矢不復作）

題朗玉兄香畹樓憶語後調寄一萼紅卽送朗玉之江北

華亭改 琦七鄰

展雲藍：勝傷心憶語，依約影梅庵，玉樹南朝，粉郎東閣，修來艱福能兼。算消過傳紅寫翠，曳湘煙蘭笑一開奩，脂盞羅紋，中箱爪印，旁有遺簪。愁說落花身世，竟如絲如縷，抽盡春蠶，梵芙鸚提，仙裙蝶散；者番夢雨重簾，積萬點相思清淚，向西風溼了舊青衫，偏又客船聽雁，回首江南。

小雲司馬兄寄示湘煙小錄情文交摯使人不忍卒讀才華衰

減勉題回絕以博破涕之笑

昭文孫原湘子滿

打槳迎來絕代妹，六朝山色作眉圖，量珠未許論身價，只向郎君索慧珠。
忽忽小劫散鴛鴦，贏得全家為斷腸，天遣文章新樣出，班姬史筆傳丁娘。
雙飛烏鵲獨飛回，消息驚從白下來，第一人間難得事，若蘭親哭趙陽臺。
一死爭如絳秀賢，情花淚葉滿湘煙，朝雲嫁得才人婿，詠筆何曾有老泉。

寄題小雲司馬香畹樓憶語後

昭文女史席佩蘭道華

夫婿專城坐上頭，雙鬟清影共銀鉤。舊稱才子如何遜，新得佳人字莫愁。小病偶還桃葉渡，離魂先返稻香樓。影梅前夢淒迷甚，忍捲湘簾月一鉤。

聞到江南陌上花，更誰緩緩度香車。雙飛烏鵲屋前誓，一曲青溪夢裏家。緣注玉簫仍眷屬，愁縈錦瑟促年華。鬱金堂小尋行跡，淒淚彈紅上碧紗。

奉題朗玉兄湘煙小錄後

吳縣曹楫堅良甫

銀雲墜影商絲咽，蘭露宵零桂簾缺。香冷秋衾弔蠅姑，一代紅顏竟長別。交枝簇蒂好韶華，長板橋東碧玉家。璫簫吹暖鈿車路，二月垂楊三月花。花鬟嬌暉迎春髻，傾城爲想顚房麗。密字芙蓉錦繡篇，真靈位業神仙記。神仙豔福本三生，喚得飛瓊下玉京。小院當風羅帶結，畫樓聽雨翠釵聲。妬花風雨催花葬，藥鑪經卷添惆悵。兩槩寒波白下潮，解愁莫問金絲帳。帳掩流蘇冰簟空，人天消息太匆匆。幾時白鵲乘烟去，何處青鸞有信通。沈沈銅漏迢迢夕，一點啼塵淚一滴。嬋娟著作並千秋，可人夫婿真憐惜。走馬應官去薊門，哀蟬落葉總銷魂。吳王宮裏紅心草，留作人間春夢痕。

奉題小雲兄湘煙小錄後調金縷曲

上元汪 度鄴樓

共說神仙侶，記春人眉修蔣黛，目成吳語，璧月瓊枝傳豔影，恰伴臨風玉樹，彈指散梵天花雨，悄綰情絲成百結，猛罡風吹作愁千縷，紅藥恨，問誰主。黃楊閨厄飄因絮，怎瑤臺優曇一現，也難留住，應是寒黃真謫降，夢繞清虛玉宇，趁鵲駕星橋歸去，小別人天成永訣，溼青衫望斷青鸞羽，難打槳，再迎汝。

嗚咽秦淮水，料從今艷沉金粉，釵銷蘭芷，十二紅樓齊掩泣，轉羨落花身世，應也為可人夫婿，總帳鏗飄珠箔影，認招魂舊是雙棲地，哀榮福，問誰比？雙修合意天心忌，早翻盡斷腸公案，綠衣黃裏，解脫我為添轉語，水月鏡花如是，況本是玉清仙子，消受豔緣三載後，更消君一卷傷心史，千古後，定傳矣。

奉題朗玉弟湘煙小錄卽送入都

琴河女史歸懋儀佩珊

春帆桃葉渡江雲，官閣梅花月二分，每翫琴書怡翠黛，自安荆布薄紅裙，致歡顏解承堂

上，侍疾身香替女君，愁見弦秋孤館裏，鴛幃遺掛異香熏。

閨閣全才似此難，檀奴那怪淚頻彈，雙修福慧緣偏短，四載繁華夢易殘；歸棹豈知成水訣，翦燈曾記話長安，祇今風雪朝天去，誰與東衣護曉寒。

紫湘主人仙逝金陵行館茲當歸旆製此奉輓以摠朗玉弟愴

情

南城陶焜午香泉

（梁州新郎）湘波千尺，湘花一選，萃出傷心人影，竹風梧雨，幾番淒切曾聽；見說歸帆催去，急騎飛來，總是無慘境，問新詞誰唱斷腸聲？吹送瑤天紫鳳笙，秋蕭瑟，人孤另，可憐宵記照花枝並，思鄭重，忘分明。

（前腔）一丸螺墨，一甌新茗，博得蘭閨心肯，香君去後，幾人能飲香名，只有河東末路，小宛中年，一樣憐才症，記紅橋同聽玉簫聲，寵柳嬌花列畫屏，藍橋約，黃姑聘，笑他家錯守溫郎鏡，千載遇，一時情。

(前腔換頭) 伴幽蘭素影娉婷，照明蟾一天淒警，佳人不壽，天公原算多情；况有高堂愛篤，夫婿緣深，大婦生同命，赴黃楊先厄，足了平生，到七夕秋河別恨成，冬郎慙，秋娘病，甚楊枝婀娜紅綃罷，調錦瑟，怨湘靈。

(節節高) 萋萋曙後星，夢郎醒，算他生未卜今生定。朝雲誅，絡秀名，看宜稱鶯箋，留得檀奴詠，舊情更向蓮臺證，落葉哀蟬不須聽，紅牙代譜相思令。

(尾聲) 因緣不隔人天信，把一柱名香禱玉京，還指仗此去江神，保護悄魂影。

讀朗玉弟湘煙小錄綴成韻語代寫哀思 吳縣葉廷琯茗生

紫玉西風遽化煙，霜禽情海恨難填，誰知香草靈均感，詩讖先成十載前。
定情本事最風華，傳遍青溪姊妹家，醉倚玉梅聽俊語，可人夫婿是秦嘉。
煙江催放木蘭舟，到及蕪城正晚秋，一樹瓊花摹豔影，美人端合住揚州。
澹掃修蛾月二分，孤芳那用異香熏，條園春讖歸來後，疊損泥金簇蝶裙。